

Etkoosing maanda Miziniganikaan miinwaa Debwetaadwin

Ntam Ezhgaabwidjig Binoojiinhyig miinwaa Engodweaangizjig Enkiitwaadjig miinwaa Jordan's Principle Tkozhwewin

Kitchi Gimaa'naang Dbaak'ni'ge'win gii debwitaan maanda.

Gonda Etkwazhwejjig miinwaa Kina Daa gii debwetaa'naawah kitchi niibna zhoonyaa (Niishtana shi nswi shi mdaaswaaching, shi nsamdana shi niwin mdaaswaaching shi mdaaswaaching shi mdaaswaaching, shi mdaaswaaching 23.34 billion) maanda mzoowe tkwazhwewin kina gii dgojiin gaaz'waad Anishinaabe binoojiinhyig miinwaa ezhi ngo'dwe'aangiz'waad. Giishpin zhinda de zhibii'gaazyin, gdaa boozbii'ge gegii maanpiigegoo wii deb'naman.

Maanda zhibiige'win wiind'maagem'gad maanda dibaaw'kinigewin miinwaa edebwe'chigaadeg. Yaabi dash wiigo wiya yaabi daa mkaan wiindmaagewin mnjimenjganing <https://www.fnchildcompensation.ca/>. Yaabi gegwa gdaa boozbiige wii kendming owe shka'yin gegoo kend'maa'gewin zhinda mnji'menj ganing aan'kesing.

Giishpin zhinda wii yaayin maanpii tkozhwewining miinwaa wii booz'bii'geyin wii diba'maagooyin, gaa wiigo gegoo memkaach gdaa zhichgesii.

Maanda ge mizinigan gda wiindmaagon giishpin wii zaagjigaabwiyin maanpii tkozhwewning. Gda zaagjigwaashkon gweta giishpin gegoo wii ndawendiziwan dibamaadwin.

Giishpin noonch wii nsastaman maanda waawindmaadwin, temgad go ge zhi giigdamba. Gdaa ginooanaa wiya wii waabmat maage wii ginooonad gensastamoonig egwiiwninendman maage ge kendang ekwedweyin.

Wenesh maanda Maamwi Tkozhwewin?

Maanda maamwi tkozhwewin kidoomgad aawan gnimaanh, Kina Daa gii mji doodwaan Anishinaabe binoojiinhyin shkonganing endaanjin maage wodi Yukon wgii migaazwag dash gonda binoojiinhyig endaa'ad. Kitchi Gimaanaang Binoojiinhyin enkiitwaadjig wgii saa'an goji bkaan.

Maanda maamwi tkozhwewin kidoomgad Kina Daa gii miigwesii maage gii bechtaa wii miigwed aapiji go menezwaad gonda Anishinaabe Binoojiinhyig. Maanda tinoowan wii maa'naa'daang'goo'maa'aad Anishinaabe binoojiinhyin gii zhiwebad ezhnikaadeg Jordan's Principle.

Gda dgwa biigaas na gegii zhinda maamwi tkozhwewning?

Ntam Ezhgaabwiimgag:

(A) Anishinaabe Binoojiinhyig giuwe, pii Nimebine Giizis, Ntam Giizhgad, Ngoding mdaaswaag shi zhaangswaag shi zhaangswa biboongag piinish Ziizbaakdoke Giizis, Nsamdana shi bezhig giizhgad, Niizhing mdaaswaag shi niishtana shi niizh biboongag, epiichi gaachiinhwaad, gaa miindwaa endaa'aad gaa migwaajin Kitchi Gimaan Binoojinnhyin Enkiitwaajig, miinwaa dash gii sindwaa goji bkaan, bekish go gitziimwaan, ookmiswaan maage mishoomisiwaan daa'nid zhiwe shkonganing maage wodi Yukon

(gaadash wiigo wodi Northwest Territories pii gii daapnindwaa; yaabi dash maanda daapnigewin gonda binoojiinhyig Kitchi Gimaanaang gii nji dbage. **(Anishinaaben Bemaawkinaajig Nokiiwin (ISC)**

B): Miinwaa Anishinaabe binoojiinhyig, maanda go ga'ye pii, epiichi gaachiinhwaad, wгаа daapnindwaa zhiwe endaa'aad miinwaa zhiwe enji ngodwe'aangizwaad, miinwaa dash gii sindwaa goji bkaan aazhoowing kitchi oodenaang ge ginimaa miinwaa wiya enwemaasgwaa, wgii yaawaan dash wiigo gegii gnawenmigwaapa, gitziimwaan, ookmisaanwaan maage mishoomsiwaan endaanjin zhiwe shkonganing maage wodi Yukon, (gaa dash wiigo wiya endaad Northwest Territories pii gii daapnin) miinwaa zhiwe owa Kitchi Gimaa Bemaawkinaajig gaami niigaanzid wii migaazwaad gonda binoojiinhyig.

Eko Niizhing Ezhgaabwiimgag: Anishinaabe binoojiinhyig (endaajig shkonganing miinwaa aazhooying kitchi oodenang ge gnimaa) gaa kenminjig kitchi minezwaad waa zhi naadmaagaazwaad gaa dash wewiip gii debnaziinaa'ah menezwaad, maage gii aawginetaagaazwag maage gaawii gegoo gii tesnoo waa zhi naadmoondwaa pii Nimebine Giizis, Ntam Giizhgad, Ngoding mdaaswaag shi zhaangswaag shi zhaangswa shi bezhig biboongag piinish Bshkoodin Giizis, Niizh giizhgag, Niizhing mdaaswaag shi mdaaswi shi niizhwaaswi biboongad;

Eko Nsing Ezhgaabwiimgag: Gitziimwaan, Mishoomsiwaan, Ookmisaan, miinwaa bezhig niwe ezhingodweaangizwaad gonda ezhigaabwidjig gegoo wii debnamwaad zhinda Ntam ezhgaabwiimgag, maage Eko Niizhing.

Yaabi noonch zhibiigaade zhiwe edigwabiigaazat zhinda maamwi tkozhwew'ning maanpii:

<https://www.fnchildcompensation.ca/>.

Wenesh maanda debwetaadwin?

Gonda etkwazhwejjig miinwaa Kina Daa gii debwetamwoog Kina Daa wii dbaget \$Niishtana shi nswi shi mdaaswaaching, shi nsamdana shi niwin mdaaswaaching shi mdaaswaaching shi mdaaswaaching, shi mdaaswaaching \$23.34 billion maanpii enaawkinigaadeg. Aabdeg dash wiigo maanpii Kitchi Gimaa dbaawkinigegamigong ntam wii zhiibaabide jii bwaa nishing.

Giishpin maanda debwetaadwin zhaab bideg zhinda Kitchi Gimaa dbaawkinigegamigong, ensa bebezahig go maaba gaa daapinigaazat endaad zhiwe ntam ezhgaabwiimgag daa debnaan \$ niimdana shi mdaaswaag, ginimaa ge go ooshmi. Minig ooshmi ge debnamwaagbane gaawii kendaawksinoo megwaa. Baamaapii go da kendaagwad kendming minig eyaawaad gegoo waa debnangik miinwaa ginimaa aanind gegoo.

Gitziimwaan, Ookmisaan, Mishoomsiwaan gaa ginawenmaadjig niwe binoojiinhyin pii gonda gaa daapnindwaa daa debnaanaawaa go ga'ye niimdana shi mdaaswaag ensa binoojiinh gaa daapnind. Giiwe dash maaba binoojinh gaa daapnind misenhyin maage shiimenhyin gaawii mamda gegoo ji debnamwaapa.

Ensa bezhig go wiya zhiwe Eko Niizhing Ezhgaabwiimgag gaa:

- (a) Tesnoonig waa zhi naadmoowin, maage gaa aawginetaagaazad, maage gegoo gaa tesnig wii naadmowind, daagii yaanaawaa dash wiigo waa minezwaad **pii Manidoo Giisoonhs, Mndaaswi shi niizh giizhgad, Niizhing Mndaaswaag shi niizhwaaswi giizhgad piinish Bshkoodin Giizis, Niizh giizhgag, Niizhing mdaaswaag shi mdaaswi shi niizhwaaswi biboongad;** gegoo daa debnaanaawaa. Giiwe gaa kitchi gdagtoojig nzaam maanda nji daa debnaanaawaa niimdana

mdaaswaag miinwaa go yaabi ooshmi. Giiwe noonch bangii gaa gdagtoosgwaa daa debnaanaawaa \$ niimdana shi mdaaswaag maanjinaaidig minig ge daapnigaazwaagwenh. Minig waa debnamwaat gaawii kendaagsinoo baamaapii kenmindwaa minig waa boozbiige'waat.

- (b) Tesnoonig waa zhi naadmoowin, maage gaa aawginetaagaazad, maage gegoo gaa tesnig wii naadmowind, daagii yaanaawaa dash wiigo waa minezwaad pii Nimebine Giizis, Ntam Giizhgad, Ngoding mdaaswaag shi zhaangswaag shi zhaangmidna shi bezhig biboongag piinish Manidoo Giisoonhs, Mndaaswi shi bezhig giizhgad, Niizhing mdaaswaag shi niizhtana shi niizhwaaswi biboongag daa debnaan dibamaadwin.

Enaagdowenmigwaajin maage owa ookmiswaan maage mishoomsiwaan wiya zhiwe eyaanit **Eko Niizhing Ezhgaabwiimgag** gaa kitchi gdaktoonit go ga'ye daa debnaanaawaa niimdana shi mdaaswaag, na'ying **Nsing Ezhgabwiimgak**.

Naanmidna nching shi mdaaswaag, shi mdaaswaag, shi mdaaswaag nching =50 million, daa naabiisjigaade wii naadmowindwaa Anishinaabe binoojiinhyag miinwaa engodweaangizjig giuwe gaa zhi kitchi psikaagwaat maanda Kina Daa gaa zhi mji doodwaad binoojiinhyin miinwaa ezhi ngodweaangiznit.

Yaabi go ooshmi Zhaangsmidna nching shi mdaaswaag, shi mdaaswaag, shi mdaaswaag nching =90 million) da naabiisdoonaawaa wii naadmaagwaat gonda getchi minezjig Jordan's Principle maamwi ewiidjii'edjig naa wii mino gaab'wiyaat miinwaa wii mino zheyaa'at.

Wenesh etemgag ge zhichgeyaamba wii boozbiige'yaanh?

1. **Yaayin go zhinda maamwi tkozhwewin:** Giishpin wii yaayin zhinda maamwi tkozhwewining miinwa wii boozbiigeeyin gaa zhiwebziyyin nji, gaawii go memkaach gegoo gdaa zhichgesii. Gdaa boozbiigii dash wiigo noonch wii kendman mjimenjiganing maanpii; <https://www.fnchildcompensation.ca/>.
2. **Gijigwashkinig maanpii maamwi tkozhwewining:** Giishpin nendman gegoo wii debnazwan maanpii debwetaadwining, gdaa gijibewdz, Zhinda **Gijibewdis Mizinigaanhs** jibwaa Binaakwe Giizis, Ngodwaaswe giizhgad, Niizhing mdaaswaag shi Niishtana shi nswi biboongag.

Giishpin wii miigweyin owe Gijibewdis Mizinigaanhs, gaawii gegoo ka debnaziin maanpii maamwi tkozhwewining.

Wii gijigwaashkiniyiyin maanpii maamwi tkozhwewining, gdaa nbochwe: <https://www.fnchildcompensation.ca/> wii mooshkinebiiman miinwaa wii miigweyin maanda Gijibewdis Mizinigaanhs zhiwe mjimenganig, maage gdaa boostoon wii niindaaweyin: PO Box 7030, Toronto ON M5C 2K7, maage go zhiwe mjimenjiganing gegwa gdaa zhi niindaawen: fnchildclaims@deloitte.ca maage gda zhibaawebinaan wodi: 416-815-2723 wii wiindmaageyiyin wii gijigwaashkineyiyin. Gdaa debinaan gegwa maanda mizinaakzigan giishpin ga kwejmat, owa genwenjiget maanpii: 1-833-852-0755

Aabdig dash wiigo wii miigweyin maanda Gijibewdis Mizinigaanhs wii gijigwaashkiniyiyin **Binaakwe Giizis, Ngodwaaswe giizhgad, Niizhing mdaaswaag shi niishtana shi nswi biboongag** maage jibwaa awang.

Aanii dash giishpin gegoo wii kidyaanh maage gegoo wii zhi aawgnetmaanh?

Maanpii Kitchi gimaan naang dbaawkidiigamigong da noondaanaawaah wii giizhaawkinamwaat maanda debwetaadwin endgwenh jiwii zhaabideg. Da noondaajgaadeh wodi Kitchi oodenaang Ottawa da maajtaawag **Binaakwe Giizis, Niizhtana shi nswi giizhgag, Niizhing Mdaaswaag shi niizhtana shi nswi biboongag.**

Nda nzhinjgaade go maanda maanpii: <https://www.fnchildcompensation.ca/>.

Gaawii go aabdig wii bizhaayin zhiwe enji dbaawkiniding maage gegoo wii kidyin maanda ji maamwi tkozhweyin gegoo wii debnaman.

Giishpin dash wiigo wii aawgnetman maage gegoo wii kidyin maanda nji, maanda gdaa zhichge:

Wii aawgnetman maage gdaa zhibiiyan waa kidyin:

1. Gdaa niindaawen waa kidyin maanpii: PO Box 7030, Toronto ON M5C 2K7 maage mjmenjganing gdaa niindaawen maanpii: fnchildclaims@deloitte.ca. Eniindaaweyin go da maajiishkigaade wodi Kitchi Gimaa dbaawkinigegamigong jiiwbua dbaawkiniding.
2. Gdaa aawgnetam gegwa wodi enji dbaawkiniding: Gdaa Kwedwe go wii dibaatan maanda maamwi tkozhweyin wodi dbaawkinige gamigong maage gda mizinaateshin zhiwe mnamenjganing.

Giishpin wii aawgnetman, aabdig kwii niindaawen owe waa kidyin maage gdaa kwedwe wii giigdayin wodi dibaawkinigegamigong. Aabdig dash kwii wiindmaage maanda **Binaakwe Giizis, Mdaaswi shi nswi giizhgag, Niizhing mdaaswaag shi niishtana shi nswi biboongag.**

Gmaapiich gonaa shkwaa debwetaadwin ndoondaajgaadeg, yaabi go da tenoon noondaajgewinan wii dibaabiishkoodeg waa zhi maamiigweng dibamaadwin. Megwaa go doo njiikaanaawaa maanda, miinwaa waa zhi dibamwindwaa egnoodmaagejig. Gaawii gonda eginoodmaagejig dan nji dbamaagaasiwag zhinda maamwi tkozhweng waa temgag. Kina Da wii ninda da dibamoowaan. Minig waa debnamwaad gonda eginoodmaagejig aabdig wii zhaabide wodi kitchi Gimaa dbaawkinigegamigong, miinwaa pii owe ge noonjgaadeg. Da zhibiigaade ge maanpii Kanada.

Egoo na temgad gezhi maanaadsegba yaang zhinda maamwi tkwazhewewning?

Eginoodmaagejig go da kitchi digishkaanaawaa maanda Kitchi Gimaa dbaawkinigegamigong wii zhaabideg maanda, nzaam mii maanda gezhi mina naadmoondwaa gonda maamwi etkwazhiwejig. Giishpin go yaang zhinda maamwi tkwazhweng, da de boozbiige go wiya gegoo wii debinang dibamaadwin. Giishpin dash wii yaayin zhinda maamwi tkwazhewewning gaawii mamdaa ooshmi ji tkwandiba maabe Kitchi gimaa maanda nji. Gda tkonaa wiigo gonda Binoojiinh Bemaawkinaajig Enkiitwaajig, maage gaa ginawenmig, maage Wiigwaam enjiginoowenmigoong. Gaawii gegwa mamdaa ji tkondiba maaba Bemaadzinjin Kina Daa Bemaadzinjin E'aasgaabwitaaget gegoo dibamaadwin maanda naasaab megwaa enjgaabwiiyin.

Wenesh zhinda eniigaangaabwit?

Maanda maamwi tkozhwewining yaawag eniigaangaabwidjig. Mii gonda: Xavier Moushoom, Jeremy Meawasige (by his litigation guardian, Jonavon Joseph Meawasige), Jonavon Joseph Meawasige, Ashley Dawn Louise Bach, Karen Osachoff, Melissa Walterson, Noah Buffalo-Jackson (by his litigation guardian, Carolyn Buffalo), Carolyn Buffalo, Dick Eugene Jackson, and Zacheus Joseph Trout. Maanda getchi shpaak Anishinaabeg Entamgabwijig (AFN) go ga'ye dgobiigaazaa niigaangaabwiyaat tkwazhwe'aat.

Gonda etkwazhwejjig da'waa'an eginoodmaagwaajin noonch go maanpii Kina Daa njibaawag: mii dash gonda: [Sotos LLP](#), [Kugler Kandestin LLP](#), [Miller Titerle + Co.](#), [Nahwegahbow Corbiere and Fasken Martineau Dumoulin LLP](#).

Gaa wiigo gonda etkwazhwejjig mamdaa wii dibamoowaa'at ninda eginoodmaagejjig, maage go wiya bekaanzinjin gegoo wii debnaming zhinda maamwi tkwazhwewning.

Aaniish gonda eginoodmaagejjig waazhi dibamoondwaa?

Kina Daa da dibamoowaan ninda eginoodmaagejjig. Gaawii gegoo danji dbamwaasiiwag zhinda maamwi tkwazhwewning enjbideg maage gonda etkozhwejjig e debnamwaat.

Gonda eginoodmaagejjig wa zhi dibamwindwaa ga'ye nda jindaanaawaa wiinwaa miinwaa Kina Daa. Da biindigebe dash wodi Kitchi gimaa dbaawkinegamigong wii noonjgaadeg miinwaa wii daapnigaadeg gmaa piich gonaa.

Noonch go yaabi maanda dbaawkinegewin waa nangdeg da dibaate zhinda: <https://www.fnchildclaims.ca> shkwaa kitchi dbaawkiniding.

Giishpin yaabi noonch wii kendman maanda maamwi tkozhewin?

Gdaa nda kendaan maanpii: <https://www.fnchildcompensation.ca/>.

Gda ndawendaan na wii aasgaabwitaagooyin maage wii naadmaagooyin?

Gdaa aasgaabwitaagoo go giishpin zhi giigdayin, wii ginoonat owa maanda Maamwi tkozhewin enjiikang maanpii: 1-833-852-075. Giishpin maanda maamwi tkwazhewin kitchi maanaadendamigyin gdaa kwedwe go wii ginoonad wiya waa bizindaag miinwaa go waa naadmaag, maanpii ga'ye owe: Hope for Wellness Helpline at 1-855-242-3310, maage gdaa nboochwe, <https://www.hopeforwellness.ca/> wii giigdayin.

Giishpin geyaabi noonch wii kendman maanda debwetaadwin miinwaa ge zhichgamba, gdaa nboochwe maanpii: <https://www.fnchildcompensation.ca/> maage gdaa zhi giigid maanpii: Tkozhewin Genwendang 1-833-852-0755.